

Euse Pensionär de Roger Federer ich tue secher ned übertriebe  
werd eus Schwyzer als Tennisjohrhunderttalänt immer in Erinnerung bliebe  
nor ei Frog duet mi no beschäftige und loht mer kei Rueh  
wie het de soveli Turnier chönne gönne met sine schlächte Schueh

Well eusi AHV am verlumpe esch chöme die z`Bärn uf dummi Idee  
und wänd nach em Fraueräntenalter au no das vo de Männer erhöhe  
goht das so witer und mer müend einisch den bes zum Läbesänd de Ruggge chrümme  
jo denne bruchts den be eus er Schwyz die 13. AHV Rännte nümme

Die National- und Ständerotswahle die schiesse mech fang richtig a  
well be de Unterlage im letschte Herbst hets viel z`viel Wahllische gha  
do weisch jo nümme werd wähle sellsch es esch zum Hoore raufe  
deför muess ich es Johrlang jetzt kei Schiesspapier me chaufe

Naturschützer und au Politiker die fendes gar ned nett  
das de Bundesrot Röschi be eus er Schwyz de Wolf zum Abschuss frey geh het  
das sigi e riese Schweinerey wo si ned chönned undestütze  
debie het er doch nur i de Bäume Schneider ehri Schwarznaseschoof welle schütze

D`Stadt Brugg die het uf afang Johr e neus Logo übercho  
aber wen ich so ghört ha siged dodröber längst ned alli froh  
öb das Logo jetzt schön esch oder ned do chame no lang diskutiere  
för mech wäri das elei scho ne Grund ned met de Brugger z`fusioniere

Jo sed vielne Johre do händ mer de lchauf im Volg obe gnosse  
doch jetzt esch nach langem hin und här de Lade leider gschlosse  
und wenn er wänd wüsse öb er denn am neue Ort wede ufgoht  
also ich sägs emol eso ehner werd de Jositsch Bundesrot

Scho s`Dritte mol striete mer jetzt be eus über Tämpo Driessig  
söll no eine säge do mer Riniker siege ned fliessig  
also du wenn das so witer goht jo den gsehn ich tendänz  
und mer mache scho bald emol em Zürcher Stadion konkuränz  
und wenn en Zürcher die Pointe denäbefendet den muess er ned s`Mässer wetze  
sondern cha eifach das Wort Zürcher met Aarauer ersetze

De Ueli Achermaa Chef vom offnige Waldhus nemmt ändi letschts Johr de Huet  
nach so vellne Johre e sim Amt tuet em die Freyzyt secher guet  
drumm gämmer em jetzt do en riese Applaus wonem werd in Erinnerung bliebe  
ahh wiso er eigentlich ufghört het er welli jetzt afo Läserbriefe schriebe

Es esch scho toll wie de Hayro luegt das of der Tannegg emmer öppis goht  
jo neuerdengs do het er sogar eusi Kerichtsäck im Agebot  
und bevor er uf falschi Gedanke chömmed ich sägs do bevor is vergässe  
das esch well de Volg obe gschlosse esch ond ned öppe wäg sim Aesse

Ob Musig Sport oder Kultur mehr händ z`Rinike e huffe Vereine  
egal was er für Inträssi händ es het secher für jede eine  
und den gets do no euse super Verein welle das esch das sägi ned  
wer ned letschte Samstag Papiersammlig gsi wüsstisch gar ned das ne no get  
Jo euse Schützeverein esch quasi inexistant lauft nor no uf de Felge  
und dorum bruchts vo eus jetzt do secher au kein Helge

Es Loch es Loch es Loch es Loch es Loch e huffe Löcher  
es Loch es Loch es Loch es Loch jo Löcher noch und nöcher  
es Loch es Loch es Loch es Loch do frogt de Fritz de Franz  
du los esch eigentlich z`Rinike no ne Wasserleitig ganz

Ispruch gäge d`Oeffnigszyte vom neue Volg und gäg de Spielplatz vor Rosestross  
Ispruch gäge d`Oeberbouig am Waldrand und das de Bus haltet of de Stross  
jo wen er gsänd mer händ z`Rinike Isproche e ganze Huffe  
drumm hoffe mer das keine Ispruch macht wenn mer of euchi Chöste eis wänd suffe

*Der Komedi*<sup>24</sup>

Wänd er me bsueche? Ich be dehei onder „[www.komedi.ch](http://www.komedi.ch)“

## Zugabervers 1

D`Fabyy Schmid Tamby vo de Opus-C-Voll hett um ehre Rücktritt bätte sie heig jetzt lang gnue de Ton ageh und well wede es 2. Glied trätte viele Dank für 15 Johr geile Sound met der als Chefin wer hät das dänkt und drumm händ mer s`Komedi Team der no es chlieses Gschänk